

La historia dil ruog da tee

In ruog da tee raquenta ord sia veta :

„Vus vesses stuiu veser mei pli baul, tochen jeu erel aunc entirs, cun uvierchel, manetscha e surtut il bi lep, lez ha fatg ch'jeu vesevel ora sc'in retg sin meisa. Tgei paupra figura fagevan perencunter las scadiolas, la zucheriera ed ils tschaduns sper mei. Jeu stoi dar tier. Jeu hai lu era schau sentir lezs ch'jeu seigi enzatgei meglier.

Gie, in di eisi lu schabegiau. In fin e pign maun ha semplamein schau dar mei giu plaun. Dapi lu vesel jeu ora schia. Jeu schischevel giun plaun ed erel miez senza schientscha. Mo dalunsch udevel jeu il lahergnem e las beffas dallas scadiolas. Ellas rievàn buca sur dil maun che veva schau curdar mei, na ellas rievàn ora mei e pudevan direct quir che quei fuva schabegiau a mi.

Ei han mess mei dalla vart e dau mei in di ad ina marcadonta. Quella ha fatg il mender ch'ins sa far cun in ruog da tee. Ella ha empleniu mei cun tratsch. Studegiei inaga. Leu nua che las pli custeivlas sorts da tee eran inaga dacasa ei tuttenina d'anflar tratsch ed aunc inaga tratsch. Lu ha quella dunna tschentau ina tschaguola en quella tiara. Jeu hai sentiu co quella ei carschida. Ella ei daventada miu cor - enstagl quei losch cor da crap ch'jeu vevel avon. Perquei che la flur era aschi biala han ei tschentau mei ensemen cun ella sil parsiel finiastra. Tut tgi che mava sperasvi contemplava ella, sin ella miravan ei e buca sin mei. Mo jeu hai saviu con impurtonts ch'jeu sun. Jeu hai procurau per humiditad e dau tegn a sias ragischs.....

Jeu ditgel a vus. Jeu sun aunc mai staus aschi cuntents sco lu, cu jeu erel cheu mo per quella flura, jeu hai diltuttafatg emblidau memez. - Quei hai jeu vuliu dir a vus.